

Inyarubha ya kabhiri ya Paauru kwa **Abhakurintu** **Ubhukangati**

Inyarubha yinu yandikirwi na Paauru, umutumwa wa Yisu Kiriisitu. Inyarubha yinu ni-ya kabhiri kwa Abhakiriisitu bhu urubhiri rwa Kurintu yinu tunayo muBhibhuriya. Nawe manyarubha yinu, Paauru aragambira inyarubha iyindi yinu Abhakurintu bhaaruzi nkina haari (2:3-4). Inyarubha yiyo siku zinu itareeho.

Manyarubha yinu Paauru aragirira kinu chagiriri achuri isiimi yaazi yu ukubhataarira Abhakurintu. Hamwimwi na riyo, Paauru areerecha azumirwi ku kubha yi ing'ana yinu igwiri kurwa kwa Tiitu, kubha Abhakiriisitu bha Kurintu bhatigiri ubhubhi bhwabhu.

Ubhwindi bhwa Paauru kwandika inyarubha yinu, bhware kwerekeererya abhiisirirya bha Kurintu ganu bhakwenderwa kokora mubhwisirirya bhwabhu. Akabhaandikira bhabhi misu iguru wa abhijja bhu ururimi bhanu bhiisikiirya mwisengerero kwa mbisi na nangu bhariija amang'ana gu ururimi. Abhijja bhayo bhaari bharabhuga, Paauru atari umutumwa we eheene wa Kiriisitu. Bhaari bhariikorya, ebho nebho abhatumwa abhaku bha Kiriisitu. Iguru wa riyo, Paauru ariibhagira kubha ewe ni-mutumwa we eheene, na anu ubhunaja kurwa kwa Kiriisitu. Arakorabhu kanzira yu

ukubhabhwarira Abhakurintu, mubhanyuuhiriru nimu ubhanaja bhwa Mungu bhararorekana. Na areerekeererya Abhakurintu iguru wa zimpirya zaabha kusakirya abharindu bha Mungu ne emeremo mamasengerero.

Amakeeren'ya

¹ Inyarubha yinu nandikiri inyi Paauru, niri hamwimwi nu umwisirirya umukindichitu Timoseo. Inyi Paauru ni-mutumwa* wa Yisu Kiriisitu kurwira kubhusigi bhwa Mungu. Turabhaandikira imwi abhiisirirya bha urubhiri rwa Kurintu, hamwimwi na abharindu† bhushi bha Mungu bhanu bhari mucharu cha Akaaya.

² Ibhigangi no omorembe kurwa kwa Bhaabha Mungu, na kuMukuru Yisu Kiriisitu, bhishi na niimwi.

Mungu ahaabhaha umwuyi munyaaku

³ Akumibhwi Mungu, Bhaabha wu Umukuru witu Yisu Kiriisitu, Bhaabha wi ibhigangi, na newe Mungu wanu akotohon'ya kwa guusi.

⁴ Ewe aratohon'ya munyaaku yitu yusi, koreke na niitwi tanaji kohon'ya abhandi bhanu bhari munyaaku, chimbu itwi tukuhunibhwa na Mungu.

⁵ Chimbu tokong'eha kobhona inyaaku iguru wa Kiriisitu, ibhuibhu Mungu arakaja kotohon'ya kuhitira kwa Kiriisitu.

⁶ Hanu tukanyaaka, turanyaaka iguru wu ukuhunibhwa kwanyu nu ubhutuurya bhwanyu.

* **1:1 Umutumwa.** Kamaragirira bhukung'u, rora ring'ana abhatumwa muKiniibhasa. † **1:1 Abharindu.** Kamaragirira bhukung'u, rora Ikiniibhasa.

Na hanu itwi tukuhunibhwa, neho na niimwi mukusung'aana ubhuhunibhwa. Ubhuhunibhwa bhuyo bharabhasakirya kwigumirirya manyaaku yiryayirya na niitwi tukunyaaka.

⁷ Ubhwisigi bhwitu kwa niimwi ni-bhukuru, ku kubha tuminyiri, chumbu mukunyaaka ncha ni-itwi, nimbu mukuhunibhwa ncha niitwi.

⁸ Abhahiiri bhitu, toreenda momenye chumbu twanyaakiri mucharu cha Asiya. Inyaaku yinu twabhwini, ikatuhiza kukira zinguru zitu, tukakina turakwa.

⁹ Amaheene, tukiiyigwa mumyuyu jitu nkina tubhwini itiniru yu uruku. Riyo rikahuruka, korereke tutigi kwiyisega itwi abheene, nawe twisege Mungu, wanu ahaaryara abhaku.

¹⁰ Ewe newe aatusabhwiri hanu twari manyaaku ikuru yu ukukwa, na arang'eha katusabhura. Itwi turamwisega ewe kubha arabha arakorabhu,

¹¹ ariibhi muriisakirya na niitwi ku katusabhira kwa Mungu. Ewe ariigwa amasabhi gaanyu na kotoha urubhangu itwi, neho abhaatu bhaaru bhakukumya Mungu iguru witu.

Paauru arasinya isimi yaazi yu ukuja Kurintu

¹² Mmbe, itwi turiyigwa kwing'ana rimwi. Zekoro zitu ziratwerecha kubha, twikiri kubhugururuku na kobhoronge bhenu bhukurwa kwa Mungu. Tutakuriribhu kubhwa bhuri bhwi isi yinu, nawe kubhigangi bhya Mungu. Nimbu twikiri kusi hanu, kindu mubhwigwani bhwitu na niimwi.

¹³ Tutakubhaandikira kwa kubhisa, nawe turabhaandikira ganu mukutura kosoma nu

ukwobhoora bhwaheene. Niriisega kubha maratwobhoora bhukung'u,

¹⁴ nangabha kwa nangwinu maratwobhoora kurubhaara urumwi. Morobhoora bhwaheene kubha, urusiku rwa ukugaruka ku Umukuru Yisu, muriiyigwa iguru witu, chimbu na niitwi tukwiyigwa iguru waanyu.

¹⁵ Naari nu ubhwisigi bhuyo, na riyo neryo ryagiriryi neende kuuza kwa niimwi hinga, korereke mobhone urubhangu rwa kabhiri.

¹⁶ Nindiri kuhita kwa niimwi, ribhaga ryu ukuja mucharu cha Makiduniya, na ribhaga rya ukugaruka kurwa Makiduniya, korereke mansakiryi morogendo rwani rwu ukuja Yudeya.

¹⁷ Nangu, muriiseega nikatiga kuuza kwa niimwi, ku kubha nitari bhwima? Hamwi muriiseega nirakangatwa na amiisigi gaani, nego gakugirya nibhugi "Hee" ribhaga irindi, na ribhaga irindi nibhugi "Ziyi"?

¹⁸ Nawe nangu, chimbu Mungu ne-moheene, ganu twabhabhuuriiri, gataari ga kubhuga, "Hee" na "Ziyi" kwi ibhaga rimwi.

¹⁹ Niragambabhu, ku kubha Yisu Kiriisitu, Umwana wa Mungu,[‡] wanu inyi, Sirwanu[§] na Timoseo, twarwaziri kwa niimwi, ataari wa kubhuga, "Hee" na "Ziyi" kwi ibhaga rimwi. Nawe kwawi ribhaga ryasi ne-"Hee."

²⁰ Nimbu, ku kubha guusi ganu Mungu aaragin'yi, gabhiri kuhitira kwawi. Necho

[‡] **1:19 Umwana wa Mungu.** Kumaragirira bhukung'u, rora Ikinibhasa. **§ 1:19 Sirwanu,** mukitabha cha Amahocha ga Abhatumwa arabhirikirwa Siira.

turabhuga kuhitira Yisu Kiriisitu, “Garami,” iguru wu ukukumya Mungu.

²¹ Mmbe, Mungu newe akutunaja itwi na niimwi kwa kugwatana na Kiriisitu. Aturabhwiri

²² na kututurira urukaamu ko kotoha Ekoru Indindu* mozekoro zitu, korereke abhi ichirikin’yu cha guusi ganu Mungu akotobhonera.

²³ Ganu nikugamba ni-ga amaheene, na Mungu aminyiri! Nitaagarukiri kwa niimwi Kurintu, ku kubha nitindiri kanyahaara zekoro zaanyu.

²⁴ Kinu nikwenda kugamba ni-kubha, tatakwenda ukukangata ubhwisirirya bhwanyu, ku kubha mukung’iri mubhwisirirya. Nawe, itwi ni-bhahocha hamwimwi na niimwi, iguru wo obhozomerwa bhwanyu.

2

¹ Mmbe nikatinira kubha, nitaaza kwa niimwi naatu, korereke nitagirya murumiki.

² Inyi niraagiryi imwi murumiki, ni-wiwi araankore nezomerwe? Niimwi bharyabharya, bhanu nagiriryi murumiki!

³ Kiyo necho chagiriryi nibhaandikiri manyarubha kubha nitakuuza kwa niimwi, nitaaza kurumikibhwa na niimwi, bhanu mukwenderwa konkora nezomerwe. Ni-maheene kubha inyi niraazomerwe, imwasi marazomerwa.

⁴ Nikabhaandikira inyarubha yirya kwa kurumika bhukung’u na kwa nyaaku mokoro yaani, na kwa ngusuri nzaru. Ubhwindi

* **1:22 Ekoru Indindu.** Kumaragirira bhukung’u, rora ikiniibhasa.

bhwani bhutari murumiki, nawe naari nereenda momenye chimbu nibhasigiri bhukung'u.

Ubbubhūriri kumāsarya

⁵ Nangu umuntu wanu arumikiryi umakindichazi, atandumikiryi inyimwene, nawe ribhaara irindi arumikiryi na niimwi imwasi. Nawe nitakwenda kukurya mang'ana.

⁶ Inyaaku yinu umuntu wuyo aabhwini kurwa kubhaaru gati waanyu, yiisiri.

⁷ Nangu moreenderwa komobheerera na komoha umwuyu, korereke ataaza kurumika bhukung'u, kuhika kukwa umwuyu.

⁸ Nirabhiisasaama mumwereche kubha mamasigiri.

⁹ Ikindi kinu chagiriryi nikabhaandikira inyarabha yinu, yaari ni-kubhagama, korereke nemenye ariibhi mwari muranyigwa kwa gusi.

¹⁰ Hanu mokobheerera umuntu wurya, na niinyi niramobheerera. Na ariibhi rereho ring'ana rinu nikwenderwa komobheerera, nimariri komobheerera mubhutangi bhwa Kiriisitu iguru waanyu,

¹¹ korereke Shitaani* ataaza kutuhiza, ku kubha tuminyiri ubhang'ini bhwazi.

Paauru murubhiri rwa Turowa

¹² Mmbe, hanu nahikiri murubhiri rwa Turowa kurwaza Ing'ana Inzamu iguru wa Kiriisitu, nikabhona Umukuru amariri kunyigurira inzira yo okohocha emeremo jazi.

¹³ Nawe nitaari no omorembe mumwuyu gwani, ku kubha nitamubhwiniyu Tiitu, umwisirirya

* **2:11 Shitaani.** Kumaragirira bhukung'u, rora ikiniibhasa.

umukindichani. Iguru wa riyo, nikabharaga abhaatu bhi iyo, nikatanura kuja Makiduniya.

Ukuragan'ya ubhuhiza bhwa Kiriisitu

¹⁴ Nawe turakumya Mungu, ku kubha aratakangata ribhaga ryasi kuriiryata ubhuhiza bhwa Kiriisitu. Na aratokora itwi kunyaragan'ya ubhuminyi bhw ing'ana iguru wa Kiriisitu ahagero husi, chimbura uruhuzu uruzumu ruhaanyaragana husi.

¹⁵ Nimbu iri, ku kubha itwi twangi amaguta amazumu ganu Kiriisitu akuhurukirya Mungu. Amaguta gayo garabihakira abhaatu busi, bhanu bhakusabhurwa na bhanu bhabhuriri.

¹⁶ Kubhanu bhabhuriri, uruhuzu ruyo ni-rubhi, rurareeta uruku. Nawe kubhanu bhakusabhurwa, uruhuzu ruyo ruzumu, rurareeta ubhuhuru. Nangu, ni-wiwi wanu akutara kohocha emeremo ju ukunyaragan'ya ing'ana inzumu ya Kiriisitu?

¹⁷ Itwi tutaangi abhaatu bhanu bhakusuruja ring'ana rya Mungu, korereke bhabhone ubhwera. Nawe itwi, kumanaga ga Kiriisitu, turaragan'ya ring'ana rya Mungu kobhoronge bhwasi mubhutangi bhwa Mungu, ku kubha ewe newe aatutumiri.

3

Abhahocha bu ubhura ubhuhya

¹ Nangu, muriiseega turatanga naatu kwikumya itubheene? Ziyi, itwi tutaangi abhaatu bhanu bhakubhareetera inyarubha yu ukwitonda hamwi kusabha inyarubha kurwa kwa niimwi.

² Imwi niimwi inyarubha yitu, yinu yandikirwi mummyu jitu, na abhaatu bharatura kosoma na koyemenya.

³ Moreereken'ya kubha mubhuri inyarubha ya Kiriisitu, yinu ikwerecha emeremo ginu twakuriri kwa niimwi. Inyarubha yiyo itaandikirwi kubhwinu, nawe kwe Ekoru ya Mungu wu ubuhuru. Itaandikirwi kumaganga, nawe yandikirwi mozekoro za abhaatu.*

⁴ Turagamba gayo, ku kubha tunu ubhwisigi kwa Mungu kuhitira Kiriisitu.

⁵ Itari turiiseega turatura kokora chuchasi kubhunaja bhwitu itubheene, nawe ubhunaja bhwitu bhararwa kwa Mungu.

⁶ Ewe newe aatuhiri ubhunaja bhwu ukubha abhahocha bhu ubhuragi ubhuhya.† Ubhuragi‡ bhuyo bhutakurwa kumigiru ginu jandikirwi, nawe ni-bhwe Ekoru Indindu, ku kubha imigiru girareeta uruku, nawe Ekoru Indindu irareeta ubuhuru.

Ubhugungu bhwu ubhuragi ubhuhya

⁷ Nangabha imigiru ginu jandikirwi kumaganga gikareeta uruku, nawe gikaaza mubhugungu, kuhika Abhiizirairi bhakatamwa korora ubhushu bhwa Musa.§ Bhakatamwa ku kubha ubhushu bhwazi bhukabharya iguru wu ubhugungu, nangabha ibhaga isuuhubhu, ukabharya kurya kukabhuurabhura.*

* **3:3** Rora Kukuruka 24:12, 31:18; Yirimiya 31:33. † **3:6** Rora Yirimiya 31:31-34. ‡ **3:6** *Uburagi*. Kumaragirira bhukung'u, rora Ikiniibhasa. § **3:7** *Musa*. Kumaragirira bhukung'u, rora Ikiniibhasa. * **3:7** Rora Kukuruka 34:29-30.

8 Nangu emeremo je Ekoru Indindu gitakubha nu ubhugungu kukiraho?

9 Na ariibhi emeremo ginu gekokora abhaatu kutinirwa ginu ubhugungu, nangu emeremo ginu gekoreeta eheene mubhutangi bhwa Mungu gitakubha nu ubhugungu kukiraho?

10 Nangu, ubhugungu bhwa ubhuragi bhwi ikari bhutaring'ini nu ubhugungu bhwa ubhuragi ubhuhya, ku kubha ubhugungu bhwa ubhuragi ubhuhya ni-bhukuru bhukung'u.

11 Ariibhi kinu chari kikumhurabhuura ibhaga isuuhubhu chari nu ubhugungu, nangu kinu kikumarama kemerano kitaana ubhugungu bhukuru kukiraho?

12 Mmbe, ku kubha riyo neryo ubhwisigi bhwitu, turakora kwa bhukararu.

13 Itwi tutaangi Musa, chimbu ikundikiiryi ubhushu ni ikisagi, korereke Abhiizirairi bhatarora chimbu ukubharya kwari kikumhurabhuura.†

14 Nawe Abhiizirairi bhatiindiri komenya, kuhika nangwinu hanu bhakosoma Ubhuragi bhwi ikari, bharatamwa komenya amaheene, bharabha nkina bharichibhwi ni ikisagi kiyo. Ikisagi kiyo kikiiri kuruusibhwaho, ku kubha kiraruusibhwaho, hanu umutu ariisiriryi Kiriisitu.

15 Amaheene nuru reero yinu, hanu ibhitabhu bhyi imigiru ja Musa bhekosomwa, zekoro zaabhu zirakundikiribhwa, bhatamenya amaheene.

16 Nawe umutu wunu akwicharira Umukuru, Umukuru aramuruusha ikisagi kiyo.

† 3:13 Rora Kukuruka 34:33-35.

¹⁷ Mmbe Umukuru newe Egoro, na hanu Egoro yu Umukuru iri, neho ubhwiyagaaruri bhuri.

¹⁸ Na bhanu bhusi tutakwikundikirya ubhushu ni ikisagi, toreereken'ya ubhugungu bhwa Umukuru chimbu ekerore kikwereken'ya ipicha. Umukuru newe Egoro, aratuchara korereke tutuubhani nawe, kurwa ku ubhugungu kuhika ku ubhugungu ubhukuru kukiraho.

4

Amanaga ga Mungu kobhegero bhyo obhototo

¹ Mmbe, ku kubha Mungu atuhiri omoremo gunu kubhigangi bhyazi, tutakukwa umwau.

² Twangiri kokora amang'ana gi imbisi na ga zisuni. Tutakukangirirya abhaatu, na tutakusangin'ya ing'ana ya Mungu nu ururimi. Nawe, turagamba amaheene habhwira, korereke abhaatu bhusi bhamenye mozekoro zaabha itwi ni-bhaatu bhe eheene mubhutangi bhwa Mungu.

³ Nawe ariibhi Ing'ana Inzumu yinu tukuragan'ya itakomenyekana, ni-kubhanu bhakurimira abheene.

⁴ Abhaatu bhayo bhatakwisirirya Yisu, ku kubha Shitaani, amatimi wi isi yinu, ahukwirya amang'ini gaabha. Kiyo neho kikugirirya Bharatamwa korora ubhwira bhwi Ing'ana Inzumu iguru wa ubhukuru bhwa Kiriisitu, newe ekerenjo cha Mungu.

⁵ Itwi tutakwirwazira itubheene, nawe turarwaza kubha Yisu Kiriisitu newe Umukuru, na niitwi, ni-bhambusa bhaanyu iguru wa Yisu.

6 Mungu akabhuga, “Ubhwirũ bhabhhanzi muki-iririma.”* Ewe newe abhanziri mozekoro zĩitũ, na kotokora komenya ubhũkurũ bhwazi, mubhushũ bhwa Yĩsu Kiriĩsitũ.

7 Nawe itwi bhanũ tuni ikibhumbikũ kiyo, twangi ebhegero bhĩnũ bhibhumbirwi kobhototo, korereke emenyekani kubha, amanaga amakũrũ go okokora emeremo giyo gararwa kwa Mungu, itari kwa niitwi.

8 Turabhona zinyaakũ nzaru, nawe tutakutamwa. Turabhona uruhaho, nawe tutakukwa umwũyũ.

9 Turanyaakibhwa, nawe Mungu atakututiga. Bharatorekera, nawe tutakukwa.

10 Zisikũ zũũsi imibhiri jitu giri matabhaaribhaari yu ukukwa ncha Yĩsu, korereke ubhũhũrũ bhwa Yĩsu bhororekani mamibhiri jitu.

11 Itwi abhahũrũ, turagenda nu uruku ribhaga ryũsi igũrũ wa Yĩsu, korereke ubhũhũrũ bhwazi bhororekani mamibhiri jitu ginũ gikukwa.

12 Mmbe, kuring’aana ne emeremo jitu, itwi turi mamabhi gu uruku, nawe kuhitira gayo, imwi marabhona ubhũhũrũ.

13 Amaandikũ Amarĩndu garabhuga, “Nikiisirirya necho nigambiri.”† Na itwũsi turiisirirya, necho tukugamba.

14 Tuminyiri kubha, Mungu wũnũ aamuryuriri Umakũrũ Yĩsu, araturyũra iitwi chimbu aamuryuriri Yĩsu. Ewe aratoreeta hamwimwi na niimwi mubhutangi bhwazi.

* 4:6 Rora Ubhutangi 1:3. † 4:13 Rora Zabhuri 116:10.

15 Amang'ana guusi ganu tokobhona ni-guru waanyu, korereke ibhigangi bhya Mungu rubhahikiri abhaatu bhaaru kukiraho, na Mungu akumibhwi. Na kuriyo arang'eha kugungibhwa.

Ubhugungu bhwa kemerano

16 Mmbe tutakukwa umwau. Nangabha imibhiri jitu girakunguha, nawe Mungu aratokora bhahya siku zusi.

17 Niragambabhu, ku kubha inyaaku yitu ni-huhu na yi ibhaga isuuhubhu. Na iratokorera ubhugungu bhwa kemerano, bhunu bhokong'eha kubha bhwaru bhukung'u.

18 Tutarora ebhegero bhinu bhekororekana, nawe torore bhinu bhitakororekana, ku kubha bhinu bhekororekana ni-bhyi ibhaga isuuhubhu, nawe, bhinu bhitakororekana, ni-bhya kemerano.

5

1 Taminyiri kubha, imibhiri jitu jangi amabhuru ganu tukwikaramu kuusi yinu. Nawe hanu gakusarika, Mungu aratoha inyumba ya kemerano mwisaaru, yinu itakwambakwa na abhaatu.

2 Kamibhiri jitu ja nangwinu turanyahaarika, turiigomba bhukung'u kubaabhwa inyumba iihya, na kwibhuhubhwa imibhiri jitu imihya ginu giri mwisaaru.

3 Hanu tukwibhuhubhwa imibhiri imihya, tutakubha tuhu.

4 Ribhaga rinu tukiiri na amabhuru giitu, turanyahaarika bhukung'u mozekoro ziitu, ku kubha turahizwa na amang'ana. Itari toreenda kuruusha imibhiri ginu gikukwa, nawe toreenda

kwibhuhibhwa imibhiri ginu gitakukwa, korereke imibhiri ginu gikukwa gimirwi nu ubhuhuru.

⁵ Mungu newe atukuriri iguru wa amang'ana gayo, na atuhiri Ekoru yaazi, korereke abhi ichirikin'yu cha gayo.

⁶ Nangu, tunu ubhwisigi ribhaga ryasi, naabha tuminyiri kubha, hanu kwikara ni imibhiri ginu, tore kore nu Umukuru.

⁷ Turiikara kanzira yu ubhwisirirya, itari ko korora kwa miisu.

⁸ Heene tunu ubhwisigi, naatu tararora hakiriku twangatigiri imibhiri ginu, na kuja kwikara nu Umukuru.

⁹ Tubhi kuusi kunu, hamwi tatabha kuusi kunu, ubhwindi bhwi ne-kozomeerya Umukuru.

¹⁰ Nimbu, ku kubha itwasi turiimirira mubhatangi bhwi ikitumbi cha Kiriisitu chi itiniru, korereke bhusi bhahaabhwu amarihi kuring'aana na ganu bhaakuriri kumubhiri kunu, gabhi amazumu hamwi gabhi amabhi.

Ukugwatan'ya abhaatu

¹¹ Mmbe, tuminyiri kubha toreenderwa kusuka na kwitegeerera Umukuru. Turakaja kuruta abhaatu, korereke bhatari kwisirirya. Mungu atuminyiri bhwaheene chimbu tati, na niinyi niriisega imwasi mutwizi bhwaheene mozekoro zaanyu.

¹² Itari turagema kwikumya kwa niimwi, nawe toreenda kubhaha umweya gu ukwikumya iguru witu. Kanzira yiyo, murabha na amang'ana gu ukubhagarukirya bhanu bhakwikumirya amang'ana gaabhu gi igurugurubhu, na gataru amang'ana ga mokoro.

13 Ariibhi turarorekana bhasazi turi, ni-guru wa Mungu, nawe ariibhi turarorekana kubha tuna amang'iini, ni-guru waanyu.

14 Ubhushiigi bhwa Kiriisitu bharatukangata, ku kubha tuminyiri kubha umuutu wumwi akakwa iguru wa abhaatu bhushi, enzobhooro yaku ni-kubha, abhaatu bhushi bhakakwa.

15 Na akakwa iguru wa abhaatu bhushi, korereke abhahuru bhatigi kwikara iguru waabhu abheene, nawe bhiikari iguru wa wunu aakuuri na kuryaka iguru waabhu.

16 Nangu kutangira nangwinu tutakorengekan'ya umuutu wuwushi kwa komororabhu. Nangabha ribhaga irindi twari turarora Kiriisitu kunzira yiyo, nawe nangu tutakomororabhu kwiki.

17 Umuutu wuwushi wunu agwatiini na Kiriisitu, abhiiri muutu muhya, gi ikari gahitiri, amang'ana amahya gahikiri!

18 Gayo guusi ne emeremo ja Mungu. Ewe atwigwaniryi neewe kunzira ya Kiriisitu.* Na niitwi atuhiri emeremo ju ukwerecha abhaatu inzira yu ukugwatanibhwa na Mungu.

19 Nekwe ukubhuga kubha, kuhitira kwa Kiriisitu, Mungu aari aragwatan'ya abhaatu neewe, ataabhabhariiri ubhushi bhwabhu. Na atuhiri itwi emeremo ju ukubhurarira abhaatu ing'ana yu ubhugwatani bhuyo.

20 Mmbe, Kiriisitu atutumiri kohocha emeremo jazi, na kuhitira kwa niitwi Mungu arabhasabha mwigwani nawe. Turabhasabha iguru wa Kiriisitu, mwigwani neewe.

* 5:18 Rora Abharuumi 5:10.

²¹ Kiriisitu ataari nu ubhubhi bhwabhwusi, nawe Mungu akamubharira ubhubhi bhwitu bhwusi, korereke itwi tubharwi bhe eheene mabhutangi bhwa Mungu kuhitira kwawi.

6

¹ Nangu, ku kubha turahocha emeremo hamwimwi na Mungu, turabhiisasaama mutiisirirya ibhigangi bhirya mwasung'ini kurwa kwa Mungu bhimburi bhaha.

² Mungu arabhuga muMaandiku Amarindu, “Ribhaga rinu ryindirwi, nikakwigwa, urusiku rwu ubhusabhurwa, nikakusakirya.”* Mmbe itegeerera, ribhaga rinu rikwindibhwa, ni-rinu, urusiku rwu ubhusabhurwa, ni-ranu!

Ukwigumirirya komeremo ja Mungu

³ Tutakokorera umuntu wawusi ring'ana ryaryusi rinu rikumwigatan'ya, korereke obhohocha bhwitu bhutagambwa kibhi.

⁴ Nawe toreerecha kumang'ana guusi kubha, ni-bhahocha bha Mungu turi. Turakorabhu kukwigumirirya bhakung'u manyaaku na tabhaaribhaari nzaru.

⁵ Tutimirwi, tubuhirwi mokebhoho, na turigirwi na amaribhita ga abhaatu. Tukiriri emeremo imikung'u, tutingiziri na tuhuyiri ni inzara.

⁶ Naatu turiiyeerekan'ya kubha abhahocha bha Mungu kubhuguruku, kubhumiini, kubhwigumirirya kubhuzamu, kanzira ya ukukangatwa ne Ekoru Indindu, kubhasigi bhwa amaheene

* 6:2 Rora Isaaya 49:8.

7 na ku kurwaza amang'ana ga amaheene. Turakora gayo gusika kumanaga ga Mungu. Eheene neyo ebheseme bhyitu, urubhaara rwu ubhuryu na rwu ubhamsi.[†]

8 Itwi turahokerya Mungu, ibhi kwa koregwa, kuririirirwa hamwi kugungibhwa. Turarorekana kubha abhabhihi turi, nawe turagamba amaheene.

9 Turarorekana ncha bhanu bhataminyikini, nawe tuminyikini bhwaheene. Turarorekana nkina turakwa, nawe bhahuru turi. Tutimirwi bhukung'u, nawe tukiri kwitwa.

10 Na turarorekana kubha turumikiri, nawe ribhaga ryasi tono obhozomerwa. Turarorekana kubha bhahabhi turi, nawe tubhaniibhiryi bhaaru. Turarorekana kubha tataana chuchusi, nawe tone ebhegero bhyusi.

11 Abhakurintu imwi, turagamba na niimwi habhwiru, ku kubha tubhasigiri kumyuyu jitu jusi.

12 Itwi tukiri kutiga kubhasiga imwi, nawe imwi mutigiri kutusiga itwi.

13 Nangu niragamba na niimwi nkina nikugamba na abhaana kubha, mubhi mutusigiri kumyuyu janyu jusi, chimbu itwi tubhasigiri imwi.

Ubhugwatani na abhaatu bhanu bhatari abhiisirirya

14 Mutagwatana na abhaatu bhanu bhatari abhiisirirya. Nangu, eheene nu ubhabhi bhiratara

[†] 6:7 **Urubhaara rwu ubhuryu na rwu ubhamsi**, enzobhooro ya amang'ana gayo iratara kubha, okobhoko kubhuryu nekwe kukugwata ekeseme, no okobhoko kwu ukamsi nekwe kukugwata ingubha yu ukwiriibha.

kwigwana? Ubhwirw ni ikiirimya bharaturabhwĩ kubha hamwimwi?

¹⁵ Kiriisitu na Shitaani‡ bharaturabhwĩ kwigwana? Umwisirirya na wunw atari umwisirirya bhaana bhahaguhiki?

¹⁶ Kuna bhwigwaniki gati ya rihekaarũ rya Mungu na amasambwa? Itwi ni-rihekaarũ rya Mungu wu ubhuharu!§ Chimbu Mungu aagam-biri,

“Niriikara hamwimwi nabhu na kogenda gati waabhu.

Nirabha Mungu waabhu, bhũsi bharabha abhaatu bhaani.”*

¹⁷ Nangu Umukuru akabhuga,

“Murwi gati waabhu, mwahukani nabhu.

Mutakun’yaku kegero kinu kibhingiri, neho na niinyi nikubhasung’aana.”†

¹⁸ Naatu akabhuga,

“Nirabha Wuusũ,

na niimwi marabha abhaana bhaani bhi ikisubhi na bhi ikikari.

Umukuru Mungu wu Ubhunaja Bhwusi abhugiri!”‡

7

¹ Nangu, abhasiigwa bhaani, Mungu aragiin’yi amang’ana gayo guusi, twibhingukyi ku kutaana nu ubhubhuruuru bhwũ amubhiri na bhwa mokoro. Tabhi abharindu kamang’ana guusi, kanzira yu ukusũka Mungu.

‡ **6:15** *Shitaani*, kuKigiriki ni-Bhiriyaari. Ni-riina irindi rya Shitaani. § **6:16** Rora 1 Abhakurintu 3:16; Abheefeeso 2:20-21.

* **6:16** Rora Abharaawi 26:12; Yirimiya 32:38; Izikiiri 37:27.

† **6:17** Rora Isaaya 52:11. ‡ **6:18** Rora 2 Samwiri 7:14; 1 Amang’ana ga Amabhaga 17:13.

Obhozomerwa bhwa Paauru

² Motohe umweya mozekoro zaanyu. Tutasaririiryi muutu wawuusi, tutanyahaariri wawuusi, na tutakangiriiryi wawuusi.

³ Nitakugamba amang'ana gayo kubhatinira, ku kubha nimariri kubhuga, imwi muri mozekoro zitu. Turi hamwimwi na niimwi yangabha kwikara hamwimwi, hamwi kukwa hamwimwi.

⁴ Niranaja kugamba na niimwi kwa bhakararu bhakuru, na niriikumya bhukung'u iguru waanyu. Niriigwa bhwaheene bhukung'u na mukariri nibhi no obhozomerwa bhukung'u, nangabha turanyaaka.

⁵ Nuru hanu twahikiri Makiduniya, tutabhwini umweya gwu ukwoyeera, ku kubha twari ni inyaaku mbaara zusi. Kwigutu kwari ni iryuma, mozekoro zitu kwari nu ubhwabha.

⁶ Nawe Mungu wenu ahaakongoora bhanu bharumikiri, akatokongoora ku kuuza kwa Tiitu.

⁷ Na itari ku kuuza kwa Tiitu ukwene, nawe nuru chimbu imwi mwamukunguriri. Akatubhurira chimbu mukwigomba kondora, na chimbu mukurumika na mukunyiibhagira. Gayo gankuriri nezomerwe bhukung'u.

⁸ Nangabha inyarubha yinu nabhaandikiiri ikagirya murumiki, nitakwitema amasoro. Nangabha nikarora nisariryi kwibhaga, nawe niminyiri kubha inyarubha yaani ikabhanyahaara kwibhaga iguhihu.

⁹ Nawe nangu nirazomerwa kubha nikaandika inyarubha yirya, itari ku kubha mukarumika, nawe ku kubha ukurumika kwanyu kukakora mutigi ubhabhi bhwanyu. Mukarumika

chimbu Mungu iindiri, iguru wa riyo itwi tutaabhanyahaariri kanzira yuyusi.

¹⁰ Ukurumika kunu kukurwa kubhwindi bhwa Mungu, kurakora abhaatu bhatigi ubhubhi bh-wabhu. Ukutiga ubhubhi itari ring'ana ryu uk-wihiitya, ku kubha rirareeta ubhutuurya. Nawe ukurumika kunu kukurwa kamang'ana gi isi yinu, karareeta uruku.

¹¹ Rora chimbu ukurumika kunu Mungu iindiri, kubhariitiri ubhwera ubhukuru! Kukuriri inamba kuru yo okokora ganu gakwenderwa, kukuriri kwibhagira ku ganu mokokora. Na kukuriri kwigatanira ubhubhi, kusuka Mungu, kwigomba kondora, na kubha nu umucha gwo okorora wanu aasariryi, asung'aaniri inyaaku yaazi. Kanzira ziyo zusi, mwikiryi kubha mataana ubhusarya mamang'ana gayo.

¹² Ibhhu, nangabha nikabhaandikira inyarabha yirya, nitaandikiri iguru wa umutu wanu amukuriri wundi kibhi, hamwi iguru wa wanu akurirwi kibhi. Nawe nekeenda morore imubheene mubhutangi bhwa Mungu, chimbu mukwihurucha iguru wiitu.

¹³ Kuriyo mutuhiri umwuyu. Kukira riyo, takazomerwa bhukung'u hanu twamuruuzi Tiitu chimbu ano obhozomerwa, ku kubha imwi makasambarucha umwuyu gwazi.

¹⁴ Inyi nikabhakumya bhukung'u mubhutangi bhwazi, na mutansukiryi. Gusi ganu twari tarabhabhurira gaari ga amaheene. Ibhuihu, ganu twabhakumiryi mubhutangi bhwa Tiitu, nego gaari amaheene.

¹⁵ Ubhusigi bhwa Tiitu kwa niimwi bharang'eha

kwaruha, hanu akuhiita ukwigwa kwanyu bhūsi na chimbu mwamung'aaniri kubhusuuku na kurigita.

¹⁶ Nirazomerwa bhukung'u, ku kubha nangu niranaja kubhiisega imwi kwa gusi.

8

Umwu gwu ukusakirya abhandi

¹ Nangu, abhahiiri bhiti, toreenda tubhabhauriri iguru wi ibhigangi bhya Mungu bhinu ahiri amasengerero ga Makiduniya.

² Abhaatu bhayo ni-bhahabhi bhukung'u, na bhakabhona ibhitiimotiimo bhihaari bhukung'u, nawe bhaari no obhozomerwa bhukuru bhunu bh-wagiriryi bhakabha bheeryakoro bhukung'u bhu ukuhurucha ebhegero bhyabhu.

³ Nirabhamenyeekeererya kubha, bhakahurucha ebhegero bhyaru, nuru kuhita ubhunaja bhwabhu. Naatu bhakahurucha kubhusigi bhwabhu abheene.

⁴ Bhaari bharatukandikija bhukung'u kubha, bhahaabhwu umweya kugwatana komeremo ju ukusakirya abharindu bha Mungu bha Yirusarimu.

⁵ Bhakakora kukira chimbu twari tukwisega. Bhakiihurucha embere kuMukuru, akumara bhakiihurucha kwa niitwi, chimbu Mungu akwenda.

⁶ Kugayo, tukasabha Tiitu aazi abhasakiriyi imwi kamariirya omoremo guyo gwi ibhigangi, ku kubha newe aatangiri kwa niimwi.

⁷ Munu ubhuniibhi bhwa amang'ana gusi. Munu ubhwisirirya, ubhunaja bhwa ukugamba

bhwaheene, ubhuminyi, umucha mukuru gwo okokora amazamu, na ubhusigi bwanyu kwa niitwi.* Mmbe, ibhuibhu, mubhi nu ubhuniibhi bhwu urubhangu rwu ukusakirya abhandi.

⁸ Nitakugamba gayo korereke nibhaswaji, nawe nereenda korora ariibhi ubhusigi bwanyu ni-bhwa amaheene, kwa kobheerecha chimbu abhandi bhanu umucha gwu ukusakirya.

⁹ Mwizi ibhigangi bhyu Umukuru witu Yisu Kiriisitu. Nangabha aari muniibhi, nawe aki-ikorya mubabhi iguru waanyu, korereke kuhitira mububabhi bhwazi, imwi mubhi abhaniibhi.

¹⁰ Nangu, iguru wa ring'ana rinu, nirabharagirira rinu rikwenderwa kwa niimwi. Umwaka ganu gwahitiri,† mwari bhe embere kwigomba kosorora na bhe embere kutanga omosororo.

¹¹ Nangu, mamari emeremo giyo kubhwigumbi bhuyobhuyo bhanu mwari nabhwi hanu mwindiri kutanga, mwihuruchi kuring'aana na ubhunaja bwanyu.

¹² Ariibhi amutu anu umwuyu gwu ukusakirya, Mungu arasung'aana bhyasi bhinu akuhurucha kuring'aana na kinu anachu, itari kukinu ataanachu.

¹³ Nitakugamba gayo ku kubha nereenda imwi manyahaariki iguru wu ukusakirya, korereke abhandi bhabhone hakiriku,

¹⁴ nawe nereenda muring'aani. Ribhaga rinu mone ebhegero bhyaru, mubhasakirya

* **8:7** *Ubhusigi bwanyu kwa niitwi*, ubhugaruri ubhandi bharatara kubha, *ubhusigi bwanyu bhanu bhuruuri kwa niitwi*.

† **8:10** Rora 1 Abhakurintu 16:1-4.

bhanu bhataanabhyu, korereke bhūsi hanu bhakobhona bhyaru, bhūsi bhabhasakiryi hanu mukusuuhirwa. Ko kokorabhu m̄rabha m̄ring'ini,

15 chimbu yandikirwi m̄Maandiku Amarindu, “Wanu aabhiringiri ibhyaru, ataari na bhya kusaaga, na wanu aabhiringiri ibhisuuhu, ataasuuhirwi.”‡

Tiitu na abhakindichazi bharatumwa Kurintu

16 Nirakumya Mungu wanu ahiri Tiitu umwuyu ganu inyusi ninagwi gwu ukubhasakirya.

17 Niragambabhu, ku kubha hanu twamusabhiri aazi kwa niimwi, akiisirirya. Naatu araaza kwa niimwi kubwindi bhwazi umwene, ariigomba kubhasakirya.

18 Hamwimwi nawe turatuma umukindichitu wanu ubhukumya bhwazi bhwu ukuragan'ya Ing'ana Inzamu bhanyaragini m̄masengerero guusi.

19 Naatu itari gayo ageene, nawe akarobhorwa na amasengerero korereke abhi hamwimwi na niitwi hanu tukuhira omosororo kubhaatu. Emeremo jo omosororo guyo, ni-guru wu ukukumya Umakuru, na ereerecha chimbu tunu ubhweryakoro kubhandi.

20 Tukuriribhu ku kubha tutakwenda kotemwa amasoro iguru wu ubhwimiiririri bhwitu bhwe ebhegero bhinu abhaatu bhahurukiryi kokoro yaabhu nziru.

21 Ubhwindi bhwitu bhutari ne-kokora amazamu mubhutangi bhwu Umakuru umwene, nawe na mubhutangi bhwa abhaatu.

‡ 8:15 Rora Kukuruka 16:18.

22 Turatuma umukindichitu uwundi hamwimwi na bha Tiitu. Ewe turuuzi manga kaaru kubha anu umucha mukuru gwo okohocha emeremo, na nangu anu umucha mukuru kukiraho, ku kubha anu ubhwisigi bhukuru kwa niimwi.

23 Nangu umuutu areende komenya amang'ana ga Tiitu, ewe ni-mukindichani, na arahocha emeremo hamwimwi na niinyi iguru waanyu. Na ariibhi umuutu areenda komenya amang'ana ga abhandi bhanu bhakuuza hamwimwi nawe, bhayo bhatumirwi na amasengerero, bhushi bharakumya Kiriisitu.

24 Mmbe mobheereche ubhusigi bhwanyu, korereke amasengerero gamenye tuna kinu kikugirya twikumyi iguru waanyu.

9

Ubhusakirya kubhisirirya bha Yirusarimu

1 Nitaana ha kubhaandikira iguru wu ubhusakirya bhwanyu kwa abharindu bha Mungu,

2 ku kubha niminyiri munu umwuyu gwu ukubhasakirya abhandi. Necho kikugirya niriikumya iguru waanyu kubhaatu bha Makiduniya, nirabhabhuurira, imwi abhaatu bhi icharu cha Akaaya, mukiihurucha kuhurucha kwima umwaka gunu gwahitiri. Umucha gwanyu gukuriri abhaaru gati waabha kubha nu umwuyu gwu ukuhurucha.

3 Mmbe, niratuma abhakindichitu bhanu, korereke muturi kwerecha maheene kubha mukiihurucha kuhurucha, chimbu nabhabhuuriiri abhaatu bha Makiduniya.

Nitakwenda amang'ana ganu niikumiiyi iguru waanyu, garorekani gataana bhwera.

⁴ Gayo gusisi itaaza kubha suni hanu niriizi kwa niimwi hamwimwi na Abhamakiduniya abhandi na kobhona makiiri kubhanura, chimbu twari nu ubhwisigi bhukuru kurwa kwa niimwi, na niimwi korora zisuni bhukung'u.

⁵ Nangu nikarora ni-bhwaheene nibhasabhi abhakindichitu bhanu bhakangati kuuza kwa niimwi, korereke muturi bhwaheene ebhegero chimbu mwaragiri kuhurucha. Kuzira yiyo marabha muhurukiryi kwa kwenda imubheene, itari kwa kuhatikwa.

Ukukurucha ikimweso kumwuyu gwo obhomerwa

⁶ Muhiiti ring'ana rinu, "Wenu akuhamba bhisuuhu, aragesa bhisuuhu, na wenu akuhamba bhyaru, aragesa bhyaru."

⁷ Abhaatu bhusi bhahuruchi chimbu bhindiri mumiuyu jabhu, bhatahurucha kwa kwitiimaata hamwi kwa kuhatikwa, ku kubha Mungu asigiri abhaatu bhanu bhakuhurucha kumwuyu gumwi.

⁸ Mungu aratura kubharorera ibhigangi kukira chimbu mukwenda, korereke ibhaga ryasi mubhi na bhyasi bhinu mukwenda, na mong'ehe kokora amazumu bhukung'u.

⁹ Chimbu yandikirwi muMaandiku Amarindu, "Ahurukiryi kumwuyu gwazi gwasi, ahiri abhabhi,

ibhigangi bhyazi ni-bhya kemerano."*

¹⁰ Mungu newe akoha amahambi zimbusuru za akuhamba ni ibhyakurya. Ibhuihu, arabhaha

* 9:9 Rora Zabhuri 112:9.

imwi zendetere zu ukuhamba na kozoongera. Ewe arabhaha na kobhoongera ubhweryakoro.

¹¹ Arabhaha ubhuniibhi kwa guusi, korereke muturi kubha bheeryakoro siku zuusi. Hayo neho abhaatu bhakukumya Mungu iguru we ebhegero bhinu tukubhahirira kurwa kwa niimwi.

¹² Irabhabhu, ku kubha emeremo ju ubhweryakoro ginu mokokora, gitakusakirya abharindu bha Mungu bhanu bhasuuhirwi abheene, nawe giragirya abhaatu bhaaru bhakumyi Mungu.

¹³ Bharagunga Mungu, ku kubha emeremo janyu gereerecha imwi ni-bhahocha bhazumu. Na bharamugunga ku kubha mwisiriiryi Ing'ana Inzumu iguru wa Kiriisitu, na ku kubha yu ubhweryakoro bhwanyu bhwa ukubhasakirya ebho na abhaatu bhusi.

¹⁴ Bharabha bharabhasabhira kwa Mungu, bhariigomba kubha hamwimwi na niimwi iguru wi ibhigungi bhinu Mungu abhahiri imwi.

¹⁵ Akumibhwi Mungu kubhigungi bhyazi ibhikuru bhinu bhihitiirin'yi.

10

Paauru aragarukirya bhanu bhakomorega

¹ Mmbe, inyi Paauru nirarorekana munyuhu hanu nikubha hamwimwi na niimwi, nawe mukararu hanu nikubha kore na niimwi. Nawe nangu, nirabhiisasaama kwa bhunyuhu nu ubhuzumu bhwa Kiriisitu.

² Nirabhasabha, mutagirya nibhi nu ubhukararu hanu niriizi kwa niimwi. Niragambabhu, konzobhooro nizi niratara kubha mukararu kubhaatu

bhūsi bhanu bhakwiseega kubha itwi turiikara ncha abhaatu abhandi bha muusi yinu.

³ Nangabha turiikara kuusi kunu, tatakwitana riihi ncha abhaatu bha kuusi kunu.

⁴ Ebheseme bhyitu bhya riihi bhitari bhinu abhaatu bhakohokerya kuusi kunu, nawe bhina amanaga ga Mungu, na bhiragwisha rigoobhe ryu umubhisa ryusi.

⁵ Turasarya amiisiigi guusi gu ururimi na amang'ana guusi gu ukwikumya ganu gakorecha abhaatu komanya Mungu. Na turagwata amiisiigi guusi, korereke giitegeererere Kiriisitu.

⁶ Na hanu mukubha mumwigwiri, itwi turabha tamariri kutinira amang'ana guusi ganu gatari gu ubhwigwa.

⁷ Morore ganu gari mubhutangi bhwa amisu gaanyu! Umuntu wanu akwirora ewe ni-wa Kiriisitu, ahiiti na niitwi ni-bha Kiriisitu, nche ewe.

⁸ Nuru niriikumya kuhita ekerengo iguru wu ubhanaja bhunu Umukuru atuhiri, tuturi kubhanaja na itari kubhasarya, kwiki nitakorora zisuni iguru wu ubhanaja bhuyo.

⁹ Nitakwenda nerorekani kwa niimwi kubha, nereenda kubhakanga kuhitira zinyarubha zaani.

¹⁰ Niragambabhu, ku kubha bharabhuga, "Zinyarubha za Paauru zina amang'ana maritu, na amang'ana amahaari. Nawe hanu akubha hamwimwi na niitwi ataana amanaga, na amang'ana gaazi garabha gataana bwera."

¹¹ Umuntu wanu aabhugiri, amenye kubha, ganu tukwandika muzinyarubha tore kore, nego toreokore hanu tukubha na niimwi.

¹² Itwi tatakwiring'aan'ya nuru hasuuhu na

abhaatu bhanu bhakwikumya hamwi kwituubhan'ya nabhu. Nawe bhatiizi ryaryusi ku kubha bhariiring'aan'ya abheene kobheene na kwituubhan'ya abheene kobheene.

¹³ Nawe itwi tutakwikumya kukira ekerengo chitu. Nawe turiikumya iguru we ekerengo che emeremo ginu Mungu atuhiri. Emeremo giyo nejo ginu tokokora nuru kwa niimwi.

¹⁴ Tutakwikumya kukira ekerengo che emeremo jitu, chimbu yangabhiri tukiri kuhika kwa niimwi. Nawe itwi twari bhe embere kubhareetera Ing'ana Inzumu iguru wa Kiriisitu.

¹⁵ Na tutakwikumya iguru we emeremo ja abhaatu abhandi, emeremo ginu itwi tutahirwi. Nawe turiisega kubha, chimbu ubhwisirirya bhwanyu bhokong'eha kukura, nimbu emeremo jitu gati waanyu gikubha girakura.

¹⁶ Hayo neho tukutura kurwaza Ing'ana Inzumu zisi izindi inu amang'ana gayo gakiri karaarikwa. Na tutakwikumya iguru we emeremo ginu jakurirwi na abhaatu ahagero ahandi.

¹⁷ Amaandiku Amarindu garabhuga, "Umuntu wanu akwikumya, ikumyi iguru wu Umukuru."*

¹⁸ Enzobhooro yaku ni-yinu, wawuasi wanu akwikumya umwene atakwisiriribhwa, nawe wanu Umukuru akumukumya, newe akwisiriribhwa.

11

Paauru na abhatumwa bhu ururimi

¹ Nuru niragamba ncho omogege, nirasabha munyiitegeerere. Heene, munyiitegeerere!

* **10:17** Rora Yirimiya 9:24.

² Inyi nirabharorera rihari, rihari rinu rikurwa kwa Mungu, ku kubha mwangi umuucha umusi-iti, wanu narunjiryi umusubhi wamwibhu, arabhirikirwa Kiriisitu.

³ Nawe nangu nirubhaha, ariibhi Haawa akakangiriribhwa ne enzoka yirya, na niimwi maratara kukangiriribhwa, mutigi ubhugururuku nu ubhuzumu bhwa Kiriisitu.

⁴ Niragambabhu, ku kubha imwi ni-bhangu kusung'aana wanu akuuza kurwaza amang'ana iguru wa Yisu ganu gari bhundi na ganu twaragiin'yi. Na muriisirirya zekoro za ururimi na amang'ana agandi bhwangu, nangabha gari bhundi na garya mwisiriiryi kurwa kwa niitwi.

⁵ Inyi nirarora nitasuuhirwi kegero chuchusi, kukira kinu bhanachu bhayo bhakwikorya abhatumwa abhakuru.

⁶ Nuru ariibhi inyi nitizi kugamba bhwaheene, nawe ubhuminyi bhwani bhakuru. Twirikiryi riyo kwa niimwi ribhaga ryasi, kuzinzira zusi.

⁷ Nikiiyicha kanzira yu ukurwaza Ing'ana Inzumu ya Mungu kwa niimwi buuha, korereke mugungibhwi. Nangu, ibhu nikakora kibhi?

⁸ Hanu nakuriri emeremo kwa niimwi, naari nina zimpirya kurwa mamasengerero agandi. Naari nkina nirabhasaakura ebhegero bhyabha, korereke nibhasakiryi imwi kwa buuha.

⁹ Hanu naari ninu ubhwindi ribhaga rinu naari hamwimwi na niimwi, nitaari murigu kwa wuwusi gati waanyu. Abhiisirirya bhanu bhaaruuri Makiduniya bhakaang'a bhinu naari nikwenda. Naari niriikabhaaha, korereke nitabha murigu kwa niimwi nuru hasuuhu,

nirakaja kokorabhu.

¹⁰ Chimbu amaheene ga Kiriisitu gari mamabhiri gwani, atareeho umuutu wawuusi mucharu cha Akaaya, wunu areendeche kwikumya iguru wa amang'ana gayo.

¹¹ Kwaki niragambabhu? Ni-ku kubha nitabhasigiri? Mungu aminyiri nibhasigiri!

¹² Nirang'eha kokora emeremo chimbu nekokora nangwini, korereke nitabhaha umweya bhanu bhakwikorya nkina nebho abhakuru, bhatamwi kwikumya kubha bharakora emeremo ncha niitwi.

¹³ Abhaatu ncha bhayo ni-bhatumwa bhu ururimi, bharakora emeremo ku kukangirirya abhaatu, bhariikorya nkina ni-bhatumwa bha Kiriisitu.

¹⁴ Ring'ana riyo ritari rya kiruguru, ku kubha nuuru Shitaani wuusi ahiikorya ncha maraika* wu ubhwiru.

¹⁵ Nangu, itari ring'ana rya kiruguru, abha-hocha bhaazi bhuusi, bhariikorya ncha abha-hocha bhe eheene. Itiniru yaabhu irabha chimbu amahocha gaabhu gari.

Paauru ariikumya iguru wi inyaaku yaazi

¹⁶ Nirabhabhuurira naatu, umuutu wawuusi atakina inyi ne-mogeege! Nawe nangabha muriiseega inyi, ne-mogeege, nirabhasabha munyiitegeerere no obhogege bhwani bhunu, korereke na niinyi niikumyi naabha hasuuu.

¹⁷ Amang'ana ganu nikugamba, gatakurwa kuMukuru, nawe niragamba ncho omogeege.

* **11:14 Maraika.** Kamaragirira bhukang'u, rora ikiniibhasa.

18 Bhaaru bhariikumya iguru wa amang'ana gi
isi yinu, na niinyi niriikumya.

19 Imwi ku kubha muna amang'ini, muriigu-
mirirya abhageege kobhozomerwa.

20 Muriigumirirya nuru umutu wanu
akubhakora imwi bhambuusa, wanu akubhiibhira
na kubharuusha ebhegero bhyanyu, na wanu
akwirora ni-mukuru kubhakira na kubhatema
mubhushu.

21 Niragamba kwa suni kubha itwi tatabhakuriri
gayo, ku kubha itwi, ni-bhanyuhiriru bhukung'u!

Nangu niragamba ncho omogege, ariibhi areho
umutu wanu akwenderwa kwikumya iguru wa
ryaryasi, na niinyi niriikumya iguru wa riyo.

22 Ariibhi ebho ni-Bhiibhuraaniya, na niinyi
ni-Mwibhuraaniya. Ariibhi ni-Bhiiziriri, na ni-
inyi ni-Mwiziriri. Ariibhi ni-bhi ikishoko cha
Abhurahaamu,† na niinyi ni-wi ikishoko cha Ab-
hurahaamu.

23 Nangu niragamba nchu umusazi, ariibhi ebho
ni-bhahocha bha Kiriisitu, inyi ne-mohocha wa
Kiriisitu kubhakira. Inyi nikuriri emeremo imikuru
bhukung'u, nibuhirwi mokebho manga kaaru
bhukung'u, nitimirwi manga kaaru bhukung'u, na
naari munyaaku yu ukukwa manga kaaru.

24 Nitimirwi na Abhayaahudi manga kataanu,
imizariti merongo itatu na kenda.

25 Nitimirwi zihimbu na Abharuumi katatu,
nitimirwi na amabhwu ramwi. Ubhwatu
bhensarikiiri katatu, na nikiikara manyanza
ubhutiku nu umwise.

† 11:22 **Abhurahaamu.**
Ikiniibhasa.

Kamaragirira bhukung'u, rora

26 Manga kaaru morogendo rwani, naari munyaaku yo okogegwa ni ibhitaaru, munyaaku ya abhasaakuri, munyaaku ya Abhayaahudi abhakindichani na kubhaatu bhanu bhataru Abhayaahudi. Naari munyaaku muzimbiri, munyaaku ya kukibhara, munyaaku ya manyanza, na munyaaku ya bhanu bhakwikorya abhiisirirya abhakindichitu.

27 Nikuriri emeremo imikung'u na kunyaaka, nitingiziri, ninyaakiri ni inzara ne enyoota, manga kaaru nibhurirwi ibhyakurya na kwikara mombeho nisiriirwi zengebho.

28 Hamwimwi na gayo guusi, siku zuusi nirahizwa ne emeremo jani mamasengerero guusi.

29 Ariibhi umutu wuwusi ni-munyuhiriru, na niinyi niriigwa munyuhiriru. Ariibhi abhaatu bhagiriryi umutu wuwusi akore ubhumbi, na niinyi niranyahaarika.

30 Ariibhi ereenderwa ukwikumya, niriikumya iguru wu ubhanyuhiriru bhwani.

31 Mungu, Bhaabha wu Umukuru Yisu, wanu akwenderwa kukumibhwa kemerano, aminyiri nitakugamba ururimi.

32 Damisiku iyo umukangati wi icharu wanu aari iyaasi wu umutimi Areeta, akatwara abhariibhi mukisiku chu urubhiri, korereke bhangwati.

33 Nawe abhaatu obhorebhe bhakantwara murwero na kunhiringitya kuhitira mwibhanga rinu ryari kunyiki ya urubhiri, nikahona kugwatwa.‡

‡ 11:33 Rora Amahocha ga Abhatumwa 9:23-25.

12

Ubhurari na ubhanyuuhiriru bhwa Paauru

¹ Nereenderwa ukwikumya, nangabha itaana bhwera. Nawe nangu niriikumya iguru wu ubhurari na amang'ana agandi ganu Umukuru aanyirichiryi.

² Niminyiri umutu wumwi Umukiriisitu,* wanu imyaka ikumi ne ene ginu jahitiri, akasaakurwa kuja mwisaaru.† Nitizi aribhi akasaakurwa na umubhiri gwazi, hamwi egoro iyeene. Mungu newe yizi.

³ Niragarukira, niinyi nitizi aribhi umutu wuyo akasaakurwa na umubhiri gwazi, hamwi egoro iyeene. Mungu newe aminyiri, nawe inyi, kinu nizi,

⁴ akasaakurwa kuhika Paradiisu.‡ Iyo akiigwa amang'ana gu ukurugura bhukang'u ganu umutu atakutara kugamba, na atakwenderwa kugamba.

⁵ Nangu, kwu umutu ncha wuyo niriikumya. Nawe nitakwikumya iguru waani inyimwene, kuruushaku iguru wu ubhanyuuhiriru bhwanihu.

⁶ Nangindiri kwikumya, nitaari nirabha mo-geege, ku kubha naari niragamba amaheene. Nawe niriikabhaaha, korereke umutu wuwusi ataaza kukina, inyi wa bhwera bhukang'u kukira ganu akorora na kwigwa kurwa kwa niinyi.

⁷ Nawe nikahaabhwa inyaaku mumubhiri gwani yinu yangi ncha rihwa rinu rekonsoma. Inyaaku

* **12:2** *Niminyiri umutu wumwi Umukiriisitu*, Paauru ari-igamba umwene. † **12:2** *Mwisaaru* kuKigiriki ni-risaaru rya katatu. ‡ **12:4** *Paradiisu*, ni-riina irindi kwa mwisaaru, hanu Mungu ari, na hanu bhakwoyeera abharindu bha Mungu bhanu bhakuuri.

yiyo, ni-mutumwa wa Shitaani, akatumwa korereke anyaaachi, nitaaza kwikumya bhakung'u iguru wa amaru gu ukurugura ganu Umukuru aanyirichiryi.

⁸ Nikamushabha Umukuru manga katatu andusha inyaaku yiyo.

⁹ Nawe ewe akamburira, "Ibhigungi bhyani bhirakwisa, konzobhooro mubhanyuhiriru nimu amanaga gaani gakororekana." Ihu, nirabha niriikumya kobhozomerwa bhakuru iguru wu ubhanyuhiriru bhwani, korereke amanaga ga Kiriisitu gabhi hamwimwi na niinyi.

¹⁰ Necho neno obhozomerwa iguru wu ubhanyuhiriru bhwani, naatu iguru wa amatuki, zinyaaku na amabhi ganu nekobhona iguru wa Kiriisitu. Nangu neno obhozomerwa, ku kubha hanu nikubha manyuhiriru, neho nikubha na amanaga.

Amakibhwi ga Paauru iguru wa Abhakurintu

¹¹ Nigambiri ncho omogeege, nawe imwi nebho mugiriryi nigambibhu. Inyi naari nereenderwa kukumibhwa. Nuru aribhi nirarorekana nitakwenderwa, inyi nitari musuuhu kukira bhanu bhakwikorya nkina ni-bhatumwa abhakuru.

¹² Hanu naari kwa niimwi nekeerekan'ya kubha umutumwa, ku kubha nikakora ibhyirikin'yu, amateemo ni ibhiruguru kubhwigumirirya bhwasi.

¹³ Ritareeho ryaryasi rinu nakuriri kumasengerero agandi, rinu nikiri kokora kwa niimwi. Kisha nikabhasariirya ku kubha nitaari murigu kwa niimwi? Aribhi riyo neryo ubhubhi bhwani, manyaabhiri!

14 Nangu nisiriiryi kuuza kwa niimwi rwa katatu, nawe nitakubha murigu kwa niimwi. Nitakwenda ebhegero bhyanyu, nawe nirabheenda imwi. Niragambabhu ku kubha abhaana bhatakwenderwa kubhika ebhegero iguru wa abhiibhuri, nawe abhiibhuri nebho bhakwenderwa kubhika ebhegero iguru wa abhaana.

15 Inyi nirazomerwa kuhurucha ebhegero bhyani nuru kwihurucha inyimwene, korereke nibhasakiryi imwi. Nawe irarorekana kubha, hanu inyi nikwongera kubhasiga, neho imwi mukusuuhya ubhasigi bwanyu kwa niinyi.

16 Muriisirirya kubha nitaari murigu kwa niimwi, nawe nurubhu abhandi gati waanyu bharabhuga, inyi ni-mung'ini, nibhakurukumbiri kubhakangirirya.

17 Nangu, nikabharuusha chuchusi kuhitira kubhaatu bhanu natumiri kwa niimwi?

18 Nikasabha Tiitu aazi kwa niimwi, hamwimwi nawe nikatama umakindichitu uwundi. Nangu, Tiitu akabharuusha chuchusi? Mutakorora kubha inyi ne ewe ne-kegero kimwi momeremo, na kubha nuru eteemwa yitu ni-yimwi?

19 Kisha muriiseega kubha ribhaga rinu bhusi turiibhagira mubhutangi bwanyu? Nawe turagamba amang'ana ganu mubhutangi bhwa Mungu, turiibhi tugwatiini na Kiriisitu. Abhasigwa bhaani, gusi ganu tokokora, ni iguru wu ukubhasakirya mokong'e mubhwisirirya.

20 Nirubhaha, hanu nikuuza kwa niimwi, nitaaza kubhabhona mari moteemwa yinu itakonzomera. Riyo rirangirya nekore ganu

gatakubhazomera. Nirubhaha ku kubha muratura kubha ni iryamana, rihari, ubhururu, ikinyawitu, ukwigobha, ukwigamba, ubhwiyungi na rihi.

²¹ Nirubhaha, hanu niriizi kwa niimwi, Mungu arankora nisuki mubhutangi bhwanyu. Nirarugura korora abhaaru gati waanyu bhanu bhaakariri ubhubhi, bhakiri kutiga ubhubhi. Bhakiri bhane eteemwa yiryayirya yi itaaru, ikisimbi na ya amang'ana agandi ga zisuni.

13

Ubhutungiri bhwi itiniru

¹ Ruru ni-rwa katatu kwa niinyi kuuza kwa niimwi. Amaandiku Amarindu garabhuga, "Ibhiina bhyusi bhitinirwi kobhomenyeekererya bhwa abhaatu bhabhiri hamwi bhatatu."*

² Nikamara kubhabhurira, chimbu niiziri kwa niimwi rwa kabhiri, nangu niragarukira nere kore. Hanu nikuuza, bhuusi bhanu bhaakariri ubhubhi na abhandi bhuusi nitakubha nibhigangi kwabhu.

³ Nirakorabhu, ku kubha moreenda ichirikin'yu cho okomenya kubha Kiriisitu aragamba kuhitira kwa niinyi. Kiriisitu atari munyuhiriru kwa niimwi, nawe areerecha amanaga gaazi gati waanyu.

⁴ Ni-maheene kubha Kiriisitu akabhambwa kumasarabha mubhanyuhiriru, nawe nangu, ni-muhuru kubhanaja bhwa Mungu. Ibhuhitu itwi bhanyuhiriru chimbu Kiriisitu aari, nawe murarora bhahuru turi hamwimwi ne ewe kubhanaja bhwa Mungu.

* 13:1 Rora Amahiityu gi Imigiru 19:15.

5 Nangu mwirengekan'yi imwi abheene, korereke momenye aribhi munu ubhwisirirya. Mwiyangariri abheene. Awi, mutizi Yisu Kiriisitu ari kwa niimwi? Aribhi itaribhu, hayo matamirwi ekerengo chu ubhwisirirya.

6 Nawe niriisega morobhoora kubha itwi tutatamirwi ekerengo chu ukubha abhatumwa wa amaheene.

7 Turasabha Mungu mutakora ing'ana ryurysi ibhi. Itari ku kubha itwi toreenda tororekani tuhikiiri ekerengo kiyo, nawe toreenda mokore amazumu, nauru itwi turaarorekani tutamirwi.

8 Niragambabhu, ku kubha tutakutara kwanga amaheene, nawe turatara kurwaza amaheene.

9 Turazomerwa ku kubha itwi bhanyuhiriru, nawe imwi muna amanaga. Turasabha Mungu abhasakiryi maring'aaniri mubhwisirirya bhwanyu.

10 Nirabhaandikira amang'ana ganu nikiri kuhika kwa niimwi, korereke hanu nikubha kwa niimwi, nitabha mahaari kuhitira ubhunaja bhwani. Niragambabhu, ku kubha ubhunaja bhunu Umukuru aang'iri bhutari ubhunaja bhwu ukusarya, nawe ni-bhunaja bhwu ukubhasakirya mokong'e mubhwisirirya.

Amang'ana gu ukwaga

11 Nangu, abhahiiri bhaani, tugiiri!† Maring'aaniri mubhwisirirya bhwanyu, mwihaani umwuyu, mubhi nu ubhumwimwi, mwikari komorembe. Na Mungu wu ubhushiigi no omorembe arabha hamwimwi na niimwi.

† 13:11 *Tugiiri*, ubhugaruri abhandi bharatara kubha, mozomerwe.

¹² Mwikeerye kubhusiigi bhwa Kiriisitu. Abharindu bha Mungu bhusi bha hanu bharabha-keerya.

¹³ Urubhangu rwa Umukuru Yisu Kiriisitu, nu ubhusiigi bhwa Mungu, nu ubhugwatani bhwe Egoro Indindu, bhumbi hamwimwi na niimwi bhusi.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553